

# ХҮШЕЯ ПАЙҒАМБАРНИНГ КИТОБИ

## Кириш

Мазкур китоб Хўшея пайғамбарнинг номи билан аталган. Хўшея пайғамбар Амос пайғамбардан кейин ваъз қилган. У асосан Исройлда\*, яъни шимолий шоҳлиқда, шоҳлик қулашидан олдин фаолият кўрсатган. Исройл шоҳлиги милоддан олдинги 722 йилда қулаган.

Китобнинг дастлабки уч бобида Хўшеяниң оиласи тасвирланади. Хўшеяниң оиласи у Исройл юртида ваъз қилган хабарнинг жонли сурати бўлиб хизмат қилади. Худо Ўз халқи Исройлнинг бевафолигини кўрсатмоқчи бўлиб, Хўшеяга: “Фоҳиша аёлга уйлан”, деб амр қилади. Фоҳиша аёл Хўшеяга уч фарзанд туғиб беради. Хўшеяниң фарзандларига Худо Исройл халқининг жазоланишини эслатиб турадиган исмларни қўяди. Худо Хўшеяга: “Бевафо хотинингни севгин”, деб амр қилади, чунки бу севги Худонинг бевафо Исройл халқига бўлган абадий севгисининг тимсоли бўлади.

Китобнинг қолган қисмида Худонинг Исройл халқи билан тузган аҳдига алоҳида эътибор берилади. Бу аҳдга кўра, Худо ва Исройл халқи бир-бирига садоқатли, вафодор бўлишлари керак бўлади. Худо доимо аҳд шартларини бажариб келади, Исройл халқи эса ҳар сафар аҳд шартларини бузади. Улар Худонинг ёрдамига ишонмай, лашкарининг кучи ва бошқа юртларнинг ёрдами билан ўзларини ҳимоя қилмоқчи бўладилар. Бундан ташқари, бутларга сифиниб, яхши ҳосил йиғиб оламиз, мол-қўйларимиз кўпаяди, деб умидини бутларга боғлайдилар.

Исройл ва Яҳудо халқлари Худодан юз ўгиришади, Худо улар билан бу борада даъволашади, уларни аҳдни бузганликда айблайди. Улар қилган гуноҳлари учун жазосини тортишади.

Уларнинг гуноҳларига қарамай, Худо Ўз халқини севади. Ниҳоят, Худонинг беқиёс севгиси уларнинг қалбларини забт этади, Худо ва халқ орасидаги муносабат тикланади. Хуллас, Хўшея китоби Худонинг меҳрибонлиги ва содик севгиси ҳақидаги китоб, деб айтсан муболаға бўлмайди. Зоро, Худо бу чексиз севгиси туфайли Ўзининг бевафо халқидан юз ўгира олмайди.

## 1-БОБ

<sup>1</sup> Яҳудо юртида\* шоҳлар Уззиё, Йўтом, Охоз ва Ҳизқиё ҳукмронлик қилган даврларда\* Исройл тахтида Ёхўш\* ўғли Ёрубом\* ўтирган эди. Ўша вақт мобайнида Бэри ўғли Хўшеяга Эгамиз Ўз сўзларини аён қилди.

### Хўшеяниң хотини ва фарзандлари

<sup>2</sup> Эгамиз дастлаб Хўшея орқали Исройл халқига гапиришни бошлагандা, унга шундай деган эди: “Бориб фоҳиша аёлга уйлан, у сенга бегона эркаклардан орттирган фарзандлар туғиб беради. Зотан, Менинг халқим ҳам фоҳишага ўхшайди\*. Улар Мен, Эгангизга бевафолик қилиб, бегона худоларга сажда қилишмоқда.” <sup>3</sup> Хўшея Диблайим қизи Гўмерага уйланди. Гўмера ҳомиладор бўлиб, Хўшеяга ўғил туғиб берди.

<sup>4</sup> Эгамиз Хўшеяга деди: “Ўғлингнинг исмини Йизрил қўй. Чунки Ёху қандай

қилиб Йизрилда қон түккан бўлса\*, тез орада Ёхунинг хонадонини ҳам ўша ахволга солиб, йўқ қиласман. Истроил шоҳлиги барҳам топади. <sup>5</sup> Ўша даврда Мен Йизрил водийсида Истроилнинг камону ўқларини синдираман\*.”

<sup>6</sup> Гўмера яна ҳомиладор бўлиб, қиз туғди. Эгамиз Хўшэяга деди: “Қизингнинг исмини Лўруҳамо, яъни «Раҳмдан бебаҳра» деб қўй. Чунки бундан буён Мен Истроил халқига раҳм қилмайман, уларни кечирмайман. <sup>7</sup> Яхудо халқига эса раҳм қиласман, уларга нажот бераман. Қиличу камон, жанг-жадал, отлару чавандозлар билан эмас, Ўз қудратим билан уларни қутқараман. Зотан, Мен уларнинг Эгаси Худоман!”

<sup>8</sup> Гўмера қизини кўкракдан чиқаргач, яна ҳомиладор бўлиб, ўғил туғди.

<sup>9</sup> Эгамиз Хўшэяга деди: “Ўғлингнинг исмини Лўёми, яъни «Халқим эмас» деб қўй. Чунки Истроил халқи энди Менинг халқим эмас, Мен эса уларнинг Худоси эмасман.

<sup>10</sup> Аммо шундай вақтлар келадики, Истроил халқи денгиздаги қум каби бўлади, уларни на санаб, на ўлчаб бўлади. Уларга: «Халқим эмас», деб айтилган бўлса, келажакда улар: «Барҳаёт Худонинг фарзандлари» деб аталади. <sup>11</sup> Яхудо ва Истроил халқлари қайта бирлашадилар. Улар ўзларига бир йўлбошли танлайдилар. Ўз юртида туп қўйиб, палак отадилар. Ҳа, Йизрилнинг\* — «Худо эккан» халқнинг қуни улуғ бир кун бўлади.”

## 2-БОБ

<sup>1</sup> Эгамиз шундай дейди: “Ака-укаларингизни — Ёми, яъни «Менинг халқим», опа-сингилларингизни — Руҳамо\*, яъни «Раҳмдан баҳраманд» деб чақиринглар.

### Истроил халқи бевафо Гўмера тимсолида

<sup>2</sup> Эй фарзандларим,  
Онангиз билан даъволашинг\*,  
Айбини юзига солинг.  
У энди хотин эмас Менга,  
Мен ҳам эр эмасдирман унга.  
Айтинг, юзидағи упа-элигини артиб ташласин,  
Эгнидаги уятсиз кийимини ечиб ташласин.  
Бўлди, фоҳишалигини бас қилсан.

<sup>3</sup> Акс ҳолда, унинг кийимини Ўзим ечиб ташлайман,  
Онасининг қорнидан тушгандай қип-яланғоч қиласман.  
Ерини бепушт сахрога айлантираман,  
Унинг юртини қақраган чўл қиласман.  
Ташналиқдан уни ўлдираман.

<sup>4</sup> Болаларига ҳам раҳм қилмайман,  
Ўйнашларидан орттирган ҳароми улар.

<sup>5</sup> Ҳа, уларнинг онаси фоҳишалик қилган,  
Уларни туққан аёл шарму ҳаёни йўқотган.  
У деди: «Ўйнашларим\* олдига кетдим.

Нону сувимни, жуну зифир матоларимни,  
Зайтун мояни шаробимни,  
Менга ўшалар берган.»

<sup>6</sup> Шунинг учун йўлини тиканаклар билан тўсаман,  
Ўтолмайдиган қилиб девор қураман.

<sup>7</sup> У ўйнашларининг кетидан қувиб етолмайди,  
Уларни излаб, тополмайди.

Кейин эса айтади:

«Биринчи эримнинг олдига қайтиб борай,  
Ахир, ўшандаги ҳолим ҳозиргидан тузукроқ эди.»

<sup>8</sup> Буғдойни, шаробу зайдун мойини,  
Унга Мен берганимни у билмайди.

Баалга\* назр қилган кумушу олтинни  
Унга Мен совға қилганимни англамайди.

<sup>9</sup> Шунинг учун ҳосил пайтида буғдойимни тортиб оламан,  
Йигим-терим мавсумида шаробимни олиб қўяман.

Баданини ёпиб турган жуну зифир матоларимни қайтариб оламан.

<sup>10</sup> Мана энди уни яланғоч қиласман,  
Ўйнашларининг олдига чиқариб қўяман,  
Қўлимдан уни ҳеч ким халос қила олмайди.

<sup>11</sup> Мен унинг базмларига чек қўяман.

Байрамлари юнги ой шодиёналарига,  
Шаббатлари ва барча тайинланган байрамларига барҳам бераман\*.

<sup>12</sup> «Ўйнашларимнинг берган тўлови», деб ўйлаган

Узумзору анжир боғларини бузиб ташлайман,

Ҳаммасини тўқайзор қиласман.

Ёввойи ҳайвонлар боғларини йўқ қиласми.

<sup>13</sup> У байрамларда Баалга атаб тутатқилар тутатгани учун,  
Узугу тақинчоқлар билан безаниб,

Ўйнашларининг кетидан юргани учун,

Мени эса тамом эсидан чиқариб юборгани учун,

Мен уни жазолайман!“

Эгамизнинг каломи шудир.

<sup>14</sup> Эгамиз шундай дейди:

“Кўп ўтмай Мен унинг кўнглини овлайман,  
Уни саҳрого олиб бориб, ширин сўзлар айтаман.

<sup>15</sup> Ўша ерда узумзорларини қайтариб бераман,  
Охор\* сойлигини умид эшиги қиласман.

Ўша ерда у Менга эргашади,

Ёшлигида\*, Мисрдан чиққан чоғида эргашгандай ортимдан юради.”

### Эгамизнинг Ўз халқига бўлган севгиси

<sup>16</sup> Эгамиз шундай демоқда: “Эй Исройл халқи, ўша куни сен Мени «Эрим» деб чақирасан, ҳеч қачон «Хўжайним» демайсан\*. <sup>17</sup> Баалнинг номини қайта тилингга олмайдиган қиласман. <sup>18</sup> Ўша куни ёввойи ҳайвонлар, осмондаги қушлар ва ерда судралувчи махлуқлар билан аҳд тузаман, улар сенга зарар етказмайди. Юртдаги барча камону қиличларни, ҳамма жанг қуролларини йўқ қиласман. Сен тинч, бехатар яшайсан. <sup>19</sup> Мен сени Ўзимга абадий никоҳлаб оламан. Сенга нисбатанadolatli ва одил бўламан. Сени доим севаман, меҳр-шафқат кўрсатаман. <sup>20</sup> Сенга вафо қиласман, сен Мени Эганг деб биласан.”

<sup>21</sup> Эгамиз демоқда:

“Ўша куни Мен халқимнинг илтижоларига жавоб бераман,  
Мен осмонга амр қиласман,

Осмон ерга ёмғир ёғдиради.

<sup>22</sup> Ер буғдой, узум, зайдун этишириади,

Улар эса ҳаёт бағишилайди Йизрилга\* —

«Худо эккан» деб аталган Менинг халқимга.

<sup>23</sup> Ҳа, Мен Йизрилни Ўзим учун бу юртга ўтқазаман.

Лўруҳамога, яъни «Раҳмдан бебаҳра» деганга раҳм қиласман,

Лўёмини, яъни «Халқим эмас» деганни «Ўз халқим» деб атайман\*.

У эса «Худойим» деб чақирап Мени.”

### 3-БОБ

#### Хўшёя бевафо хотинини қутқариб, уйига олиб келади

<sup>1</sup> Эгамиз менга деди: “Қани бор, Хўшёя! Ўйнаши бор ўша суюқоёқ хотинингга\* бошқатдан кўнгил қўй. Мен, Эгангиз, Истроил халқини қандай севсам, сен ҳам хотинингни шундай севгин. Зотан, халқимнинг ҳам кўнгли бошқа худоларга чопади, ҳовуч-ҳовуч майизни\* уларга назр қилишни халқим яхши кўради.”

<sup>2</sup> Шундай қилиб, мен ўн беш бўлак кумуш\* ва ўн беш тогора арпага\* ўз хотинимни сотиб олдим\*. <sup>3</sup> Унга дедим: “Сен узоқ вақт давомида менинида яшайсан. Фоҳишилик қилмайсан. Ўша вақт мобайнида бирорта эркакка яқинлашмайсан, мен ҳам сенга яқинлашмайман.” <sup>4</sup> Шу сингари, Истроил халқи ҳам узоқ вақт давомида\* шоҳу шаҳзодасиз, қурбонликлару бутсимон тошларсиз, эфод\* ва бутларсиз яшайди. <sup>5</sup> Бундан кейин улар қайтадан Эгаси Худога ва Довуд наслидан бўлган шоҳга\* юз буришади. Келажакда Эгамизга қўрқув билан бўйин эгишади. Худонинг баракасидан баҳраманд бўлишади.

### 4-БОБ

#### Истроил халқини Эгамиз айблайди

<sup>1</sup> Эгамизниң даъвоси бор бу юрт аҳолисига,

Эй Истроил халқи, қулоқ тут Эгамизниң сўзига:

“Бу юрт вафою садоқатни билмайди,

Улар Мен, Худони тан олмайди.

<sup>2</sup> Қачон қараманг лаънат айтишади,

Алдашади, одам ўлдиришади,

Ўғрилик қилиб, фаҳш ишларга берилишади.

Ҳамма ёқда зўравонлик, қотилликлар қилишади.

<sup>3</sup> Мана шунинг учун юрт ҳазон бўлади,

У ерда яшовчи халқ ҳалок бўлади.

Нобуд бўлади ёввойи ҳайвонлар,

Кўқдаги қушлару ҳатто денгиздаги балиқлар.

#### Эгамиз руҳонийларни айблайди

<sup>4</sup> Биронтангиз халқни айбламанг!

Уларга таъна қилманг!

Менинг даъвоим сизларга қаршиидир,

Эй руҳонийлар!\*

<sup>5</sup> Сизлар кечаю кундуз қоқиласизлар,

Ҳатто пайғамбарлар ҳам сизлар билан бирга қоқилади.

Сизларни деб Мен халқингизни нобуд қиласман!

<sup>6</sup> Ана, халқим Мени билмагани учун нобуд бўлмоқда.

Бу сизнинг айбингиз, эй руҳонийлар!

Ахир, сизлар воз кечдингизлар Мени билишдан,

Энди Мен ҳам воз кечаман сиздан.  
 Менинг руҳонийларим бўлмайсизлар!  
 Сизлар Худойингизнинг қонунларини унутдингизлар,  
 Шунинг учун Мен ҳам фарзандларингизни унутаман.  
<sup>7</sup> Эй руҳонийлар, кўпайгани сари сизнинг сонингиз,  
 Менга қарши қўпроқ гуноҳ қилдингиз.  
 Энди улуғворлигингизни шармандаликка алмаштираман.  
<sup>8</sup> Ахир, сизлар халқимнинг гуноҳ қурбонликлари\* билан  
 Қорнингизни тўйғиздингиз,  
 Халқимнинг қабиҳликларига ташнадирсиз.  
<sup>9</sup> Мана, Мен халқимни ҳам,  
 Сизни ҳам бирдай жазолайман.  
 Тутган йўлларингиз,  
 Қилган қилмишларингизга яраша қайтараман.  
<sup>10</sup> Сизлар ейсизлар, аммо қорнингиз тўймайди,  
 Зино қиласизлар, аммо сонингиз қўпаймайди.  
 Сизлар Мен, Эгангизга бўйсунмай қўйгансиз.

### **Эгамиз бутпарастликни ҳукм қилади**

<sup>11</sup> Фаҳш, шаробнинг эски ва янгиси  
 Халқимни эс-хушидан айирди.  
<sup>12</sup> Улар ёғоч бутдан ваҳий сўрашади.  
 Таёқдан панд-насиҳат олишади\*.  
 Шаҳвоний ҳирс уларни йўлдан урди,  
 Улар Мен, Худосига бевафо бўлдилар.  
<sup>13</sup> Қурбонликлар қилишаётир тоғ чўққиларида,  
 Тутатқилар тутатишаётир қирларда,  
 Эман, чинор ва қайрағочларнинг оромбахш сояларида.

Эй халқим, натижада қизларингиз фоҳиша бўлди,  
 Келинларингиз зинога ботди.  
<sup>14</sup> Аммо Мен фоҳиша қизларингизни жазоламайман,  
 Зинокор келинларингизнинг адабини бермайман.  
 Ахир, эркакларнинг ўзи ғарлар олдига бормоқда,  
 Саждагоҳ фоҳишалари\* билан улар қурбонликлар келтирмоқда.  
 Айтилган-ку, эс-хушидан айрилган халқ нобуд бўлади, дея.

<sup>15</sup> Истроил халқи Менга бевафолик қилса ҳам,  
 Бу жиноятга Яҳудо халқи қўл урмасин.  
 Улар сажда қилгани Гилгалга\* бормасин,  
 Байт-Обунга\* ҳам оёқ босмасин.  
 «Худо шоҳид», дея қасам ичишмасин.  
<sup>16</sup> Ҳа, эшакдай ўжардир Истроил халқи,  
 Кўп ўтмай Мен, Эгангиз, уларни кенг далага ҳайдаб юбораман,  
 Улар яйловдаги ёлғиз қўзига ўхшаб қолишади\*.  
<sup>17</sup> Эфрайим\* халқи кўнгил боғлади бутларга,  
 Билганларини қилишсин, қўйинг уларни ўз ҳолига!  
<sup>18</sup> Айш-ишратдан кейин улар фаҳшга берилишар.  
 Уларнинг йўлбошчилари беҳаёликни яхши кўрар.  
<sup>19</sup> Куюн уларни супуриб кетади.

Бутларга қилган қурбонликлари туфайли шарманда бўлишади.”

## 5-БОБ

<sup>1</sup> Эгамиз шундай дейди:

“Эй руҳонийлар, эшигинг буни!  
Дикқат қилгин, Исройл халқи!  
Қулоқ солгин, шоҳ хонадони!  
Сизнинг устингиздан ҳукм кетяпти.  
Сизлар Миспаҳда одамлар учун тузоқ бўлдингиз,  
Товур тоғида\* ёйилган тўр бўлдингиз.

<sup>2</sup> Қабих ишларга ботиб кетдингиз!  
Мен ҳаммангизнинг адабингизни бераман.

<sup>3</sup> Эй Эфрайим\*, жуда яхши биламан сени,  
Исройл, Мендан яшира олмассан ўз қилмишингни.  
Сен, Эфрайим, Худога бевафо бўлдинг,  
Эй Исройл, ўзингни ҳаром қилдинг.

<sup>4</sup> Мен Худойингман,  
Аммо қилмишларинг Менга қайтиб келишингга йўл қўймас.  
Мен, ўз Эгангни сен билмайсан,  
Чунки қалбинг шаҳватга тўлган\*.”

<sup>5</sup> Исройлнинг мағурурлиги ўзига қарши гувоҳлик беряпти,  
У\* жиноятлари туфайли қулайди.

Яхудо ҳам у билан бирга йиқилади.

<sup>6</sup> Исройл Эгамизнинг илтифотини излайди,  
Қўй–молларини қурбонлик қиласди,  
Аммо Эгамизни топа олмайди,  
Чунки Эгамиз уни тарқ этган.

<sup>7</sup> У Эгамизга хиёнат қилди\*,  
Бегоналардан никоҳсиз болалар туғди.  
Кўп ўтмай у мулки билан бирга хароб бўлади.

### Исройл билан Яхудо орасидаги уруш

<sup>8</sup> Эгамиз шундай дейди:

“Бурғу чалинг Гивода!  
Карнай чалинг Рамада!\*Байт–Обунда\* бонг уринг!  
Эй Бенямин, ортингдан душман келяпти!

<sup>9</sup> Жазо куни Эфрайим хароб бўлади.  
Исройл қабилаларига эълон қилган бу сўзларим  
Албатта рўёбга чиқади.

<sup>10</sup> Яхудо шаҳзодалари чегарани бузган\* фирибгарларга ўхшайди,  
Мен уларнинг устига Ўз қаҳримни жаладай ёғдирман.

<sup>11</sup> Ахир, Эфрайим бутларга эргашибни афзал кўрди,  
Энди у эзилиб, ҳукмга бардош бера олмайди.

<sup>12</sup> Мен Эфрайимни куядай емираман,  
Яхудо халқини қуртдай кемираман.

<sup>13</sup> Эфрайим ўз бетоблигини тушунгач,  
Яхудо ўз яраларини кўргач,

Эфрайим Оссурияга\* борди,  
Буюк шоҳни\* ёрдамга чақирди.  
Аммо шоҳ уларни даволай олмайди,  
Яраларига шифо бера олмайди.  
<sup>14</sup> Мен Эфрайимга шердай хужум қиласман,  
Яхудо халқига ёш арслондай ташланаман.  
Уларни Ўзим тилка-пора қиласман,  
Судраб, Ўзим билан олиб кетаман.  
Уларни ҳеч ким халос эта олмас.  
<sup>15</sup> Улар ўз айбини бўйнига олгунча,  
Чин дилдан Менга интилгунча,  
Мен Ўз маконимга қайтиб кетаман.  
Балки қайғули дамларида улар Менга қайтишар.”

## 6-БОБ

### Одамларнинг соҳта тавбаси

<sup>1</sup> Бу халқ шундай дейди:  
“Келинглар, Эгамизга қайтайлик!  
У бизни тилка-пора қилди,  
Шифони ҳам Ўзи беради.  
Бизни ярадор қилди,  
Яраларимизни Ўзи боғлайди.  
<sup>2</sup> Унинг ҳузурида яшай олишимиз учун,  
Икки кунда бизни ҳаётга қайтаради,  
Учинчи куни оёғимизга турғизади.  
<sup>3</sup> Келинглар, Эгамизни билишга интилайлик.  
Тонг отиши муқаррар бўлгандай,  
У албатта бизга зоҳир бўлади,  
Куз ва баҳорда ёмғир ёғиши табиий бўлгандай,  
У албатта олдимизга келади.”

### Исройлнинг соҳта садоқати ва оладиган жазоси

<sup>4</sup> Эгамиз шундай дейди:  
“Сени нима қилай, эй Эфрайим?!\*  
Сени нима қилай, эй Яхудо?!  
Сенинг севгинг тонгдаги тумандай тез гойиб бўлар,  
Сахардаги шудринг каби буғланиб кетар.  
<sup>5</sup> Шунинг учун сўзларим билан сени ўлгудай саваладим,  
Пайғамбарларим орқали сени чопиб ташладим.  
Чиқарган хукмим чақмоқ каби сени уради.  
<sup>6</sup> Зеро, Мен қурбонликни эмас,  
Раҳм-шафқатни истайман,  
Куйдирилган қурбонликларни эмас,  
Мени таниб-билишингни афзал кўраман.

<sup>7</sup> Халқим Одам Атодай\* аҳдни бузди,  
Эвоҳ, Менга бевафолик қилди.

<sup>8</sup> Гилад — ёвузларнинг шахридир,  
Кўчалари қон доғларига тўладир.

<sup>9</sup> Руҳонийлар қароқчиларга ўхшайди,  
Улар пистирмада ётиб, қурбонини пойлашади.  
Шакам шаҳри\* йўлида қотилликлар қилишади,  
Ҳа, улар мудҳиш жиноятларга қўл урди.

<sup>10</sup> Мен Исроилда даҳшатли ҳодисани кўрдим:  
Эфрайим бевафолик қилди!  
Исроил ўзини булғади!

<sup>11</sup> Эй Яхудо, сен учун ҳам ўрим пайти белгиланди.

Мен халқимни яна фаровонликка эриштирумоччи бўлганимда,

## 7-БОБ

<sup>1</sup> Исроилни шифоламоқчи бўлиб турганимда,  
Унинг\* бузуқлиги ошкор бўлди,  
Самариянинг жиноятлари очилди.  
Улар маккорона иш тутишади,  
Ўғрилар хонадонларни ўмарашади,  
Қароқчилар йўлтўсарлик қилишади.  
<sup>2</sup> Қилган барча қабиҳликлари ёдимда,  
Бироқ улар буни хаёлига келтирмайди.  
Мана, улар гуноҳларга ботиши,  
Кўз ўнгимда бу гуноҳлар гавдаланади.

### Саройдаги фитналар

<sup>3</sup> Одамлар шоҳни ёвузиликлари билан хушнуд қиласар,  
Улар бекларни ҳийлалари билан шод этар.

<sup>4</sup> Уларнинг ҳаммаси садоқатсиз ва маккор,  
Ловуллаган тандирга ўхшайди.  
Новвой хамирини қориб бўлгунча,  
Хамир ошиб тайёр бўлгунча,  
Ҳатто олов ковлашга ҳам эҳтиёж йўқ.

<sup>5</sup> Шоҳ зиёфат берган куни  
Беклар шоҳга майдан ичириши,  
Шоҳ мазахчилар билан ҳамтовоқ бўлди.

<sup>6</sup> Уларнинг юраклари тандирга ўхшайди,  
Шоҳга қарши улар фитна уюштиради,  
Кечаси билан ғазаби чўғдай тутаб ётади,  
Саҳарга келиб, оловдай ловуллаб ёнади.

<sup>7</sup> Тандирдай қизишган бу ҳамма одамлар,  
Ҳукмдорларини ямламай ютаптилар.  
Натижада шоҳлари бирин–кетин нобуд бўляпти\*,  
Аммо биронтаси ҳам Менга илтижо қилмаяпти.”

### Исроил ва ўзга халқлар

<sup>8</sup> Эфрайим бошқа халқларга қоришган.  
У хом пишган нонга ўхшаб қолган.

<sup>9</sup> Ўзга халқлар унинг кучини кесди,  
У эса буни англамайди.  
Сочлари оқариб бўлди,

У эса буни пайқамайди.

<sup>10</sup> Истроилнинг мағрурлиги

Ўзига қарши гувоҳлик беради.

Бошига тушган қулфатларга қарамай

Истроил ўз Эгаси Худога қайтмайди,

Юзини Унга бурмайди.

<sup>11</sup> Эгамиз шундай дейди:

“Эфрайим кабутарга ўхшар,

Ҳам бефаросат, ҳам овсар.

У Мисрдан ёрдам сўрайди,

Пир этиб Оссурияга учади.

<sup>12</sup> Учганда, Мен унга тўр ташлайман,

Овланган қушдай ерга тушираман.

Тўдалашганини эшитсан, жазосини бераман.

<sup>13</sup> Халқимнинг ҳолигавой!

Ахир, улар Мендан узоқлашди!

Энди нобуд бўлишади!

Ахир, Менга қарши бош қўтаришди!

Уларни халос қиласадим-у,

Аммо Менга ёлғон гапиришди.

<sup>14</sup> Улар Менга чин дилдан илтижо қилмайди,  
Аммо тўшакларида ётиб, фарёд чекишади.

Бутпарастлардай баданларини тилиб,

Буғдой ва шароб талаб қилишади\*.

Менга қарши бош қўтаришади.

<sup>15</sup> Мен Ўзим уларни боқдим, кучайтиридим,

Улар эса Менга қарши фитна қилади.

<sup>16</sup> Ҳамма ёқдан мадад излайди,

Мен, Худойи Таолога эса юз бурмайди.

Улар яроқсиз бир камонга ўхшайди,

Уларга асло ишониб бўлмайди.

Беклари ҳақоратли сўзлар айтганлари учун

Қиличдан ҳалок бўлади.

Бу қилмишлари учун

Мисрда кулги бўлишади.”

## 8-БОБ

### Бутпараст Истроил ҳалқи ҳукм қилинади

<sup>1</sup> Эгамиз шундай дейди:

“Қани бўлинг, бонг уринг!

Душман\* бургутдай хонадонимга ҳужум қилмоқда.

Ахир, ҳалқим аҳдимни барбод қилди,

Улар қонунимни бузди.

<sup>2</sup> Истроил ҳалқи Менга фарёд қилади:

«Эй Худойим, Сени тан оламиз», деб айтади.

<sup>3</sup> Ўзлари эса эзгуликни рад этишди,

Душманлар уларни таъқиб қилади.

<sup>4</sup> Улар розилигимни сўрамай шоҳлар танлашди,  
Ижозатимни олмай, мулозимлар тайинлашди.  
Олтину кумушларидан бутлар ясашди,  
Шу орқали бошларига ҳалокат келтириши.  
<sup>5</sup> Самарияликларнинг олтин бузоғини\* Мен рад этдим!  
Уларга қарши аланга олгандин Менинг ғазабим.  
Қачон улар ўзларини поклаб олишади?  
<sup>6</sup> Бутни Истроиллик ҳунарманд ясаган-ку,  
Бут Худо эмас!  
Самария шахрининг бузоғи парчаланиб ташланади.

<sup>7</sup> Шамолни эккан одам бўронни ўриб олар.  
Буғдой бошоқсиз бўлса, халқ нонга зор бўлар.  
Буғдойингиз бошоқ туккан тақдирда ҳам,  
Уни бегоналар еб адо қиласар.  
<sup>8</sup> Бошқа халқлар орасида Истроил адо бўлди,  
Қадрсиз сопол идишга у ўхшаб қолди.  
<sup>9</sup> Ёлғиз дайдиган қулондай у,  
Оссурияга ёрдам сўраб борди.  
Эфрайим\* ўзини ўйнашларига сотди.  
<sup>10</sup> У бошқа халқларга сотилган бўлса ҳам,  
Мен уни йиғиб оламан.  
Оссурия шоҳининг\* зулми остида  
У тезда хазон бўлади.

<sup>11</sup> Эфрайим гуноҳларини ювмоқчи бўлди,  
Курбонгоҳлар қуриб ташлади.  
Курбонгоҳлар эса гуноҳ макони бўлиб қолди.  
<sup>12</sup> Мен бу халққа кўплаб қонунлар ёздим,  
Бироқ қонунларимни улар ёт деб билади.  
<sup>13</sup> Улар Мен, Эгасига аъло қурбонликлар келтиришса ҳам,  
Курбонлик гўштидан тановул қилишса ҳам,  
Мен улардан мамнун бўлмайман.  
Мен жиноятларини эсга оламан,  
Гуноҳлари учун жазосини бераман.  
Улар Мисрга қайтиб кетади\*.  
<sup>14</sup> Истроил ўз Яратувчисини унутиб, саройлар қурди.  
Яхудо кўплаб шаҳарларни мустаҳкам қилди.  
Мен эса шаҳарларига ўт қўяман,  
Қалъаларини оловга ем қиламан.”

## 9-БОБ

### Истроил халқи жазоланади

<sup>1</sup> Эй Истроил, бас қил шодлигингни!  
Бошқа халқлардай нишонладинг сен байрамингни!  
Сен Худога бевафолик қилдинг.  
Баалга фоҳишадай\* сажда этдинг,  
Олган ҳосилингни Баалдан тўлов деб билдинг.

<sup>2</sup> Энди хирмону шароб мешларинг сенга етарлича озуқа бермас,  
Янги шаробинг чанқоғингни босмас.

<sup>3</sup> Сен Эгамизнинг юртида қолмайсан,  
Мисрга қайтиб кетасан\*.

Ҳа, Оссурияда ҳаром овқат ейсан.

<sup>4</sup> Эгамизга шароб назр қила олмайсан,  
Келтирган қурбонликларинг Унга маъкул бўлмайди.  
Бундай қурбонликлар азадорнинг нонига ўхшайди\*,  
Ундан еганларнинг ҳаммаси булғанади.

Зоро, келтирган қурбонликларинг қорин учун, холос,  
Бундай қурбонликлар Эгамизнинг уйига киритилмайди,  
Эгамизга улар назр қилинмайди.

<sup>5</sup> Эй Истроил, энди сен тайинланган байрамларни ўтказа олмайсан!  
Эгамизнинг муқаддас йиғинларини нишонлай олмайсан!

<sup>6</sup> Сен офатдан қочиб қутулсанг ҳам,  
Миср\* сенга чангалини солади,  
Пойтахти Нуф\* сенга қабр бўлади.  
Кумуш хазиналаринг янтоққа насиб бўлади,  
Хароба уйларингни тиканак ўт босади.

<sup>7</sup> Эй Истроил, билиб қўйгин:  
Ҳисоб–китоб вақти келди!  
Жазо олиш пайти етди!  
Кўплаб гуноҳларинг сабабли,  
Чексиз адоватинг туфайли,  
Сен пайғамбарларни аҳмоқ ҳисоблайсан,  
Рухдан илҳомланган одамларни телба деб биласан.

<sup>8</sup> Эй Эфрайим\*,  
Худойим пайғамбарларни сенга посбон қилди.  
Аммо сен уларни тузоққа туширдинг,  
Худосининг юртида уларга адovат қилдинг.

<sup>9</sup> Гивода разиллик қилган аждодларингга\* ўхшаб қолдинг,  
Улардай ярамас ишларга берилиб кетдинг.  
Аммо Худо жиноятингни эсга олади,  
Гуноҳингга яраша жазоингни беради.

### Истроилнинг гуноҳи ва унинг оқибати

<sup>10</sup> Эгамиз шундай дейди:  
“Мен Истроилни илк бор топганимда,  
Сахрода узум солган токни топгандай бўлдим.  
Ҳа, ота–боболарини биринчи кўрганимда,  
Анжирнинг чиллаки меваларини кўргандай бўлдим.  
Аммо улар Пиёр тоғига келганда\*,  
Ўзларини шарманда Баалга бағишладилар.

Кўнгил қўйган ўша бутдай жирканч бўлиб қолдилар.  
<sup>11</sup> Эфрайимнинг шуҳрати қущдай учиб кетади.

Уларда на фарзанд тугилади,  
На аёллари ҳомиладор бўлади,  
На пушти камаридан бола бино бўлади!  
<sup>12</sup> Фарзанд ўстириш насиб қилган тақдирда ҳам,

Биронтасини қолдирмай йүүк қиласан.

Холига вой, уларни тарк этаман!

<sup>13</sup> Мен Эфрайимни күрганимда,

У Тир шахрига ўхшарди,

Гүзэл ерда жойлашганди.

Аммо энди Эфрайим ўз болаларини

Қотил олдига олиб чиқади.”

<sup>14</sup> Эй Эгам, бу халқингга Сендан нима тилай?!

Аёлларини бепушт қилгин,

Эмиза олмайдиган қилгин.

<sup>15</sup> Эгамиз шундай дейди:

“Уларнинг ҳар бир қабиҳлиги Гилгалдан\* бошланган,

Үша ерда нафратлана бошладим улардан.

Қабиҳ қилмишлари учун

Уларни юртимдан ҳайдаб чиқараман.

Энди уларга меҳр қўймайман.

Уларнинг ҳамма беклари Менга қарши бош кўтарган.

<sup>16</sup> Эфрайим қулади,

Унинг илдизлари қуриди,

Мева беришга у ожиз бўлди.

Фарзанд кўрган тақдирда ҳам,

Авайлаган зурриётини ўлдираман.”

<sup>17</sup> Истроил халқини Худойим рад этади,

Улар Худога итоат қилмади.

Халқлар орасида дарбадар бўлишади.

## 10-БОБ

### Истроил гуноҳкорлиги учун сургун қилинади

<sup>1</sup> Истроил гуркираган,

Ҳосилдор ток кабидир.

Аммо ҳосили кўпайгани сари,

У кўплаб қурбонгоҳлар қурди.

Юрти равнақ топгани сари,

Бутсимон тошларига зеб берди.

<sup>2</sup> Садоқатсиз бу халқ энди таъзирини ейди.

Эгамиз қурбонгоҳларини вайрон қилади,

Бутсимон тошларини синдириб ташлайди.

<sup>3</sup> Кўп ўтмай улар айтишади:

“Биз Эгамиздан қўрқмадик,

Шунинг учун шоҳимииздан айрилиб қолдик.

Аммо шоҳнинг қўлидан нима ҳам келарди?!”

<sup>4</sup> Улар бемаъни гаплар галирмоқда,

Сохта қасамлар ичиб, аҳдлар тузишмоқда.

Натижада эгатлардаги заҳарли ўтдай,

Даъволар униб чиқмоқда.

<sup>5</sup> Самария аҳли\* Байт–Обундаги\*  
Олтин бузоғидан\* хавотир олади,  
Унинг учун улар аза тутишади.  
Бутидан хурсанд бўлган руҳонийлар ҳам  
Бут сургун бўлганидан йиғлашади.

<sup>6</sup> Бутнинг ўзи Оссурияга олиб кетилади,  
Буюк шоҳга\* тақдим қилинади.  
Эфрайим\* шарманда бўлади,  
Умидини бутга боғлагани учун\*  
Исройл уятга қолади.

<sup>7</sup> Самария шоҳи сувга ғарқ бўлган пайраҳадай  
Ҳалок бўлади.

<sup>8</sup> Исройлнинг гуноҳига сабаб бўлган  
Обундаги\* саждагоҳлар йўқ қилинади.  
Қурбонгоҳларини янтоғу тикан босади.  
Одамлар тоғларга: “Бизни босиб қолинглар!” дея бақиришади.  
Қирларга: “Устимизга қуланглар!” деб ёлворишади.

### **Исройл устидан Эгамиз Ўз ҳукмини эълон қиласи**

<sup>9</sup> Эгамиз шундай демоқда:  
“Эй Исройл, сен Гивода гуноҳ қила бошладинг\*,  
Ўша ерда гуноҳдан чиқмай қолди сенинг бошинг.  
Гиводаги жиноятчилар жазосини олгандай,  
Сен ҳам жазодан қочиб қутула олмайсан.  
<sup>10</sup> Мен хоҳлаган пайтимда жазоингни бераман.  
Сенга қарши халқларни бирлаштираман.  
Икки баробар кўпайган жиноятларинг учун  
Душманлар сенга киshan солади.

<sup>11</sup> Эфрайим ўргатилган бузоққа ўхшарди,  
Янчишни у хўп яхши кўёарди\*.  
Мана энди унинг гўзал бўйнига,  
Мен бўйинтуруқ тақаман.  
Энди унга омоч тортираман\*.  
Қани, Яхудо шудгор қилсин!\*  
Эфрайим\* ўзи учун мола боссин!  
<sup>12</sup> Эй Исройл, ўзингиз учун солиҳлик уругини экинг,  
Чексиз севгини ўриб олинг.  
Ҳайдалмаган ерингизга ишлов беринг,  
Вақт келди! Мен, Эгангизга интилинг!  
Шунда Мен олдингизга бораман,  
Ёмғир ёғдиргандай, сизга нажот бераман.

<sup>13</sup> Сен ёвузликни экдинг,  
Адолатсизликни ўриб олдинг,  
Ёлғоннинг мевасидан единг.  
Сен ўз қучингга таянганинг учун,  
Сон–саноқсиз сипоҳларингга ишонганинг учун,  
<sup>14</sup> Жангу жадаллар сени четлаб ўтмайди.

Шох Шалман Байт-Арбэлни жангда вайрон қилгандай\*,  
Хотинларни бола-чақалари билан тошга уриб ўлдиргандай,  
Ҳамма шаҳарларинг вайрон бўлади.

<sup>15</sup> Эй Байтил\*, сен қабиҳликлар қилганинг учун,  
Бу кунлар бошингга тушади.  
Тонг отгач, эй Истроил, шоҳинг ўлдирилади.”

## 11-БОБ

### Худонинг исёнкор халқига бўлган муҳаббати

<sup>1</sup> Эгамиз шундай дейди:

“Мен Истроилни болалигида яхши кўрар эдим,  
Ўз ўғлонимни Мисрдан чақириб олган эдим\*.

<sup>2</sup> Уни қанча кўп чақирсан,  
Мендан\* шунча кўп узоқлашарди.  
Баалга қурбонликлар келтиради,  
Бутларга тутатқилар назр қиласди.

<sup>3</sup> Эфрайимга\* юришни Мен ўргатган эдим,  
Уни қўлларимда кўтариб юрган эдим.

Аммо қилган ғамхўрлигимни у билмади.

<sup>4</sup> Мен эса уни меҳр ила етаклагандим,  
Муҳаббат ришталари ила олиб юрган эдим.  
Бўйнидан бўйинтуруқни\* олиб ташлагандим,  
Мулойимлик билан уни боққандим.

<sup>5</sup> Халқим тавба қилишдан бош тортди.

Шунинг учун Мен уларни энди  
Мисрга жўнатиб жазолайман\*,  
Ҳа, золим Оссурияга тобе қиласман.

<sup>6</sup> Шаҳарларида қилич ҳукм суради,  
Дарвозаларининг тамбаларини йўқ қиласди.  
Ёвуз режалари туфайли халқим қиличдан ҳалок бўлади.

<sup>7</sup> Қачон қараманг, улар Мендан юзини ўгиришади.  
Пайғамбарларим халқни Менга қайтишга даъват қилса-да,  
Халқ Мендан — Худойи Таолодан мадад тиламайди\*.

<sup>8</sup> Эй Эфрайим, қандай қилиб сендан воз кечай?!

Эй Истроил, қандай қилиб сени ташлаб кетай?!

Адмани йўқ қилганимдай, сени йўқ қила олармиканман?!

Завўйимга\* қилганимни сенга қила олармиканман?!

Бундай қилишга юрагим бетламас асло!  
Сенга бўлган меҳрим уйғонди.

<sup>9</sup> Йўқ, сочмайман сенга қаҳр-ғазабимни,  
Эй Эфрайим, қайта барбод қилмайман сени,  
Зоро, Мен Худоман, инсон эмас,  
Орангиздаги Муқаддас Худоман,  
Олдингизга жаҳл билан бормайман.

<sup>10</sup> Мен, Эгангиз, шердай ўкираман,

Үшанды халқым ортимдан эргашади,  
Овозимни эшигч, фарзандларим ғарбдан шошиб келишади.  
<sup>11</sup> Улар қушлардай учеб келади Мисрдан,  
Каптарлардай етиб келади Оссурия юртидан\*.  
Мен уларни уйларига элтиб қўяман.  
— Эгамизнинг каломи шудир. —

### Исройл ва Яхудони Худо айблайди

<sup>12</sup> Эфрайим атрофимни ёлғон билан ўраб ташлади,  
Исройл хонадони Мени ҳийлага кўмиб ташлади.  
Яхудо халқи Менга қарши бош кўтарди,  
Мен, Муқаддас Худога улар итоат қилмаяпти\*.”

## 12-БОБ

<sup>1</sup> Эфрайим\* гармсел\* боқиб юрар,  
Кун бўйи шарқдан эсган шамол кетидан қувар.  
Ёлғону зўравонликни у орттирас.

Оссурия билан сулҳ тузиб,  
Зайтун мойини Мисрга жўнатар.

<sup>2</sup> Яхудога Эгамиз даъво қилади.  
Ёқуб наслининг\* таъзирини У беради,  
Тутган йўлига яраша уни жазолайди.

<sup>3</sup> Онасининг қорнидаёқ Ёқуб акаси билан талашган\*,  
Улғайгач эса Худо билан олишган\*.

<sup>4</sup> Ха, фаришта\* билан олишиб, уни енгган эди,  
Кейин йиғлаб, илтифот қилишини сўраганди.  
Байтилда\* Ёқуб Худони топганди,

Ўша ерда Худо билан суҳбат қурганди\*.

<sup>5</sup> Парвардигори Олам — Эгамиз Ўшадир,  
Эгамиздир Унинг номи!

<sup>6</sup> Эй Ёқуб насли, Худойингизга қайтинг.  
Севги ваadolатга интилинг,  
Сабр–тоқат ила Худодан умид қилинг.

<sup>7</sup> Эгамиз шундай дейди:  
“Халқим тарозидан урган савдогарга ўхшайди,  
Фиригарлик қилишни улар хўп яхши кўради.

<sup>8</sup> «О, мен бойман,  
— деб мақтанасан, эй Эфрайим. —  
Мен ўзимга давлат орттирдим,  
Боримни пешана терим билан топдим.  
Ҳеч ким мени гуноҳда айблай олмас.»

<sup>9</sup> Аммо Эгангиз Худо — Менман,  
Сени Мисрдан олиб чиққанман.  
Мен сенга саҳрова зоҳир бўлар эдим,  
Ўша даврдагидай сени яна чодирларда яшаттираман\*.

<sup>10</sup> Мен пайғамбарларга гапиргандим,

Үзим уларга күп ваҳийлар бергандим,  
Улар орқали сени, эй халқим, огохлантирган эдим.  
<sup>11</sup> Аммо Гиладдаги\* ёвузлик түхтамади,  
Гилгалда\* буқалар бутларга аталиб  
Хамон қурбонлик қилинмоқда.  
Шунинг учун Гилад аҳли албатта барҳам топади,  
Гилгалдаги қурбонгоҳлар бузиб ташланади,  
Улар шудгор қилинадиган далалардан  
Улоқтириб ташланган тошлардай бўлиб қолади.”

<sup>12</sup> Ёқуб Орам\* юртига қочиб борди\*,  
Хотин олиш учун у\* қулдай ишлади,  
Қалин эвазига қўйлар боқди\*.  
<sup>13</sup> Эгамиз вақти келиб пайғамбар\* юборди,  
Ёқуб наслини\* Мисрдаги қулликдан олиб чиқди,  
Ўша пайғамбари орқали уларни боқди.  
<sup>14</sup> Аммо Эфрайим Эгамизни қаттиқ ранжитди.  
Тўккан қон учун Эфрайимни Раббий жазолайди,  
Уни ҳақоратлагани учун адабини беради.

## 13-БОБ

### Исроил устидан чиқарилган сўнгги ҳукм

<sup>1</sup> Эгамиз шундай дейди:  
“Илгари Эфрайим\* гапирганда ҳаммани титроқ босарди,  
Исроилда унинг мартабаси улуғ эди.  
Аммо Эфрайим Баалга сажда қилиб, гуноҳ орттириди,  
Шундай қилиб, ўзини ўлимга маҳкум этди.  
<sup>2</sup> Ҳозир ҳам халқим гуноҳ устига гуноҳ қилишар.  
Ўзларига бутлар ясашар,  
Кумушдан маҳорат билан санамлар ишлашар\*,  
Буларнинг барчаси бор-йўғи ҳунарманднинг иши-ку!  
Менинг халқимга шундай деб айтишяпти\*:  
«Бутларга қурбонликлар келтиринглар!  
Олтин бузоқларни ўпинглар!»  
<sup>3</sup> Шунинг учун улар тонгги тумандай бўлади,  
Бирпасда ғойиб бўладиган шудрингга ўхшаб қолади.  
Шамол хирмондан учирган тўпондай улар ғойиб бўлади,  
Мўридан чиқадиган тутунга ўхшаб қолади.

<sup>4</sup> Аммо Эгангиз Худо — Менман.  
Эй Исроил, сени Мисрдан олиб чиққанман.

Мендан бошқа Худони сен билмайсан,  
Мендан бошқа йўқдир нажоткоринг.

<sup>5</sup> Мен саҳрода\* сенга ғамхўрлик қилдим,  
Сувсиз қақраган чўлда сени боқдим.

<sup>6</sup> Серҳосил ўлқада қорнингни тўйғиздим\*,  
Аммо қорнинг тўйғач, манман бўлиб кетдинг,  
Шу сабабдан сен Мени унутдинг.

<sup>7</sup> Энди Мен йўлингни қоплондай пойлайман,

Сенга бир шердай ҳужум қиласман.

<sup>8</sup> Болаларидан айрилган она айиқ каби ташланаман,  
Сени тилка–пора қиласман.  
Ўша жойдаёқ сени шердай ғажийман,  
Йиртқичга ўхшаб сени қонга белайман.

<sup>9</sup> Эй Истроил, ўз бошингга ўзинг бало орттирдинг,  
Ахир, Менга — Ўз Мададкорингга қарши чиқдинг.

<sup>10</sup> Шаҳарларингни қутқарадиган шоҳинг қани?!  
«Бизга шоҳу ҳокимлар бер», деб сўраган бошлиқларинг қани?!  
<sup>11</sup> Мен жаҳл устида сенга шоҳларни бердим,  
Ғазабга минганимда уларни олиб ташладим.

<sup>12</sup> Эфрайимнинг жинояти ёзиб қўйилган,  
Ҳа, унинг гуноҳи китобга битилган.

<sup>13</sup> Истроилнинг яшашга имконияти бор эди,  
Аммо у нодон болага ўхшади,  
Онани тўлғоқ тутганда,  
У қориндан чиқиши хоҳламади.

<sup>14</sup> Мен бу халқни ўликлар диёридан қутқаармиканман?!  
Уларни ўлимдан халос қиласмиканман?!\*  
Эй ўлим, қирғин олиб келгин!  
Эй ўликлар диёри\*, ҳалокатли қучингни кўрсатгин!\*  
Энди Мен раҳм-шафқат қилмайман.”

<sup>15</sup> Истроил қариндошлари орасида  
Серпушт ва фаровон бўлса–да,  
Эгамиз унинг устига шарқ шамолини юборади,  
Саҳродан эсан гармселни\* жўнатади.  
Истроилнинг булоғини қуритади,  
Унинг чашмасини қовжиратади.  
Хазинасидаги қимматбаҳо зийнатларини тортиб олади.

## 14-БОБ

<sup>1</sup> Самария аҳолиси\* ўз Худосига қарши бош кўтарди,  
Энди улар гуноҳининг жазосини тортади.  
Улар қиличдан ҳалок бўлади,  
Гўдакларини душманлар ерга уриб ўлдиради,  
Ҳомиладор аёлларнинг қоринларини ёради.

### Хўшёя Истроил халқига хитоб қиласди

<sup>2</sup> Эй Истроил, Эганг Худога қайтгин!  
Ахир, гуноҳ туфайли сен қуладинг.  
<sup>3</sup> Гапингни тайёрлаб, Эгамизга қайт.  
Сен Унга шундай деб айт:  
“Гуноҳларимиздан кечиб юборгин,  
Ибодатимизни қабул қилгин.  
Қурбонгоҳингда буқаларни қурбонлик қилгандай,  
Биз Сенга мадхиямизни назр қиласмиз.

<sup>4</sup> Оссурия бизга нажот бермайди,  
Биз жанговар отларга минмаймиз.  
Қўл билан ясалган бутларни  
Энди биз «худоларимиз» деб атамаймиз.  
Эй Эгамиз, биз — етимларга  
Фақат Сен раҳм-шафқат қиласан.”

### **Исройлга Эгамиз янги ҳаёт ваъда қилади**

<sup>5</sup> Эгамиз шундай дейди:  
“Мен халқимга шифо бериб,  
Уларни бевафоликдан қайтараман,  
Уларга қайта кўнгил қўяман,  
Мен жаҳлдан тушдим.  
<sup>6</sup> Мен Исройл учун шудрингдай бўламан,  
Шунда Исройл нилуфардай очилади,  
Лубонон ўрмонидай томир отади.  
<sup>7</sup> Уларнинг новдалари ўсиб чиқади,  
Зайтун дараҳтидек кўркам бўлади,  
Лубонон садридай муаттар ҳид таратади.  
<sup>8</sup> Уларнинг соясида халқлар яшайди.  
Исройл мўл буғдой етиштиради,  
Улар узумзордай кўп ҳосил беришади,  
Лубонон шаробидай машҳур бўлишади.

<sup>9</sup> Эй Эфрайим\*, Мен бутларингга асло ўхшамайман!\*  
Сенинг ибодатларингга жавоб бераман,  
Сенга ғамхўрлик қиласан.  
Мен доим яшил сарв дараҳти кабидирман\*,  
Олган мўл ҳосилингнинг манбаидирман.”

### **Хотима**

<sup>10</sup> Ким доно бўлса,  
Бу ерда ёзилган сўзларни тушунади,  
Ким фаҳм-фаросатли бўлса,  
Буларнинг ҳаммасини англаб олади.  
Эгамизнинг йўллари тўғридир.  
Солиҳлар Унинг йўлларидан юради,  
Исёнчилар эса қоқилиб тушади.

## ИЗОҲЛАР

*Исроил* — мазкур китобда шимолий шоҳлик *Исроил* деган ном билан, жанубий шоҳлик эса *Яхудо* деган ном билан юритилган. Тўлиқроқ маълумотга эга бўлиш учун луғатдаги ИСРОИЛ ва ЯҲУДО сўзларига қаранг.

**1:1 Яхудо юрти** — мазкур китобда жанубий шоҳлик *Яхудо* деган ном билан, шимолий шоҳлик эса *Исроил* деган ном билан юритилган. Тўлиқроқ маълумотга эга бўлиш учун луғатдаги ЯҲУДО ва ИСРОИЛ сўзларига қаранг.

**1:1 ...Уззиё, Йутом, Охоз ва Ҳизқиё ҳукмронлик қилган даврлар...** — милоддан олдинги 781-687 йиллар.

**1:1 Ёхўш** — ибронийча матнда бу исмнинг бошқа варианти *Йўш*.

**1:1 Ёрубом** — милоддан олдинги 783-743 йилларда ҳукмронлик қилган.

**1:2 ...Менинг халқум ҳам фоҳишага ўхшайди** — Эски Аҳдда зино ёки фахш сўзлари кўпинча мажозий маънода ишлатилган бўлиб, Эгамизга хиёнат қилишни ва бошқа худоларга сифинишни билдиради. Хўшёя билан хотинининг орасидаги муносабат Эгамиз билан Исроил халқи орасидаги муносабатнинг тимсоли бўлиб хизмат қиласи.

**1:4 ...Ёху қандай қилиб Йизрилда қон тўйккан бўлса...** — лашкарбоши Ёху Исроилнинг янги шоҳи қилиб тайинлангандан кейин, Эгамизнинг амрига кўра, Исроил шоҳи Ёрамни ўлдириди. Сўнг у Ёрамнинг қабих отаси Ахаб хонадонини қириб ташлади (4 Шоҳлар 9:1-10:31 га қаранг). Бу воқеалар Йизрил шаҳрида юз берган эди. Кейинчалик Ёху ҳам, унинг зурриётидан бўлган шоҳлар ҳам Худога бутун қалби билан итоат этмай, бутларга сажда қилдилар. Шунинг учун, мазкур оятда баён қилинишича, Худо уларни Ахаб хонадонининг аҳволига солмоқчи. Ҳақиқатан ҳам, Ёрубомнинг ўғли Закариё ўлдирилгандан кейин, Ёхунинг сулоласи барҳам топди (4 Шоҳлар 15:8-12 га қаранг).

**1:4-5 Исроил шоҳлиги барҳам топади.** <sup>5</sup>...*Исроилнинг камону ўқларини синдираман* — милоддан олдинги 722 йилда Оссурия шоҳи Шалманасар Исроилга, яъни шимолий шоҳликка ҳужум қилиб, пойтахти Самарияни забт этди. Сўнг Исроил халқининг аксарият қисмини Оссурияга сургун қилди (4 Шоҳлар 17:1-6 га қаранг). Шундай қилиб, шимолий шоҳлик таг-томири билан йўқ бўлиб кетди.

**1:11 Йизрил** — Исроил сўзига оҳангдош бўлган бу ном “Худо экади” деган маънони билдиради. Шу бобнинг 4-оятида бу исм ҳукм ҳақидаги хабарни ифодаласа (ўша оятнинг изоҳига қаранг), ушбу оятда умид ҳақидаги хабарни билдиради.

**2:1 Ёми...Руҳамо** — Худо Исроил халқини қайта тиклашини, уларга яна барака беришини билдирадиган исмлар. Ибронийча матнда шу китобнинг 1:6, 9-оятларида бу исмларга инкор маъносини ифодаловчи лў олд қўшимчаси қўшилган. Лўруҳамо ва Лўёми исмлари Худо Исроил халқининг бошига келтирадиган жазони билдиради.

**2:2 Эй фарзандларим, Онангиз билан даъволашиб...** — Хўшёя ўз фарзандларини хотини Гўмерани қилган бевафоликлари учун айблашга чақиради. Бу ўринда Гўмера — Исроил халқининг, Хўшёя эса Эгамизнинг тимсолидир. Исроил халқи Эгамизга қилган бевафоликлари учун Эгамиз улардан юз ўгирган эди (яна 1:2 изоҳига қаранг).

**2:5 Ўйнашларим** — Канъон халқларининг худолари назарда тутилган. Истроил халқи бу худоларга топинган ва улардан ёмғир, серҳосил далалар ва наслдор молқўйлар сўраган.

**2:8 Баал** — Канъондаги халқлар сажда қилган ҳосилдорлик худоси бўлиб, эркак қиёфасида тасаввур қилинган. Тўлиқроқ маълумотга эга бўлиш учун луғатдаги БААЛ сўзига қаранг.

**2:11 Мен унинг базмларига...барҳам бераман** — халқ асирикка олиб кетилгандан кейин ўзларининг ютида нишонланган байрамлар ва базмлардан уларда фақатгина хотиралар қолади.

**2:12 «Ўйнашларимнинг берган тўлови»** — Истроил халқи, бизга мўл ҳосилни Канъон халқларининг худолари берган, деб нотўғри ўйлаганлар.

**2:15 Охор** — ибронийчадаги маъноси қулфат. Ёшуа 7:24-26 га қаранг.

**2:15 Ёшлигидা** — Эгамиз Истроил халқини Мисрдаги қуллиқдан олиб чиқсан даврга ишора. Истроил халқи Эгамизга эргашиб, Синай сахросига борган ва Эгамиз Синай тоғида улар билан аҳд тузган (Чиқиш 19:1-8 га қаранг).

**2:16 ...ҳеч қачон «Хўжайним» демайсан** — ибронийча матнда ...ҳеч қачон “баал” им демайсан. “Баал” Канъон худосининг номи бўлиб, “хўжайн” деган маънени ифодалайди. Ибронийларда аёл киши эрига “эрим” ёки “хўжайним” деб мурожаат қилган. Бу сўзлар кенг қўлланилган. Келажакда Истроил халқи вафодор аёлдай, ўзини бутунлай Худога бағишлийди. Улар Баалдан ёрдам сўрамайдилар, ҳатто унинг номини тилга ҳам олмайдилар.

**2:22 Йизрил** — 1:11 га ва ўша оятнинг изоҳига қаранг.

**2:23 ...«Раҳмдан бебаҳра» деганга раҳм қиласман...«Ҳалқим эмас» деганни «Ўз ҳалқим» деб атайман** — шу бобнинг 1-оятига ва ўша оятнинг изоҳига қаранг.

**3:1 ўша суюқоёқ хотининг** — 1:2-3 га қаранг.

**3:1 ҳовуч-ҳовуч майиз** — қадимги пайтларда одамлар узумларни қуритгандан кейин, қоқиларни ҳовучларида қаттиқ сиқиб, думалоқ шакл берганлар. Шу тариқа қоқилар узоқ вақт сақланган ва қундалик истеъмол қилинадиган егулик бўлган. Буларни одамлар Канъон халқларининг худоларига назр қилардилар. Чунки халқ, ўша худоларга топинсак, улар бизга мўл ҳосил беради, деб ишонарди.

**3:2 ўн беш бўлак кумуш** — тахминан 170 граммга тўғри келади.

**3:2 ўн беш тоғора арпа** — ибронийча матнда бир ҳўмр ва бир летек, яъни бир ярим ҳўмр. Бу тахминан 330 литрга тўғри келади.

**3:2 ...ўз хотинимни сотиб олдим** — чамаси, Гўмера чўри бўлиб қолган, Хўшёя эса уни қайтиб сотиб олган. Ўша пайтда қулу чўрининг нархи 30 бўлак кумуш эди (Чиқиш 21:32 га қаранг). Хўшёя нархнинг ярмини кумуш билан тўлаган. Бунга қўшиб берган 15 тоғора арпанинг қиймати ҳам 15 кумуш бўлакка тўғри келган бўлиши мумкин (4 Шоҳлар 7:1, 16 га қаранг).

**3:4 ...Истроил халқи ҳам узоқ вақт давомида...** — Истроил халқининг келажакда сургун қилинишига ишора. Истроил халқи бир пайтнинг ўзида ҳам Канъон халқларининг худоларига, ҳам Эгамизга сажда қилгани учун, уларнинг шоҳлиги ва диний урф-одатлари барҳам топади.

**3:4 эфод** — одатда бу сўз олий руҳоний киядиган махсус кийимга нисбатан ишлатилган (Чиқиш 28:3-14 га қаранг). Эфодга кўкракпеч маҳкамланарди, кўкракпеч халтасида Урим ва Туммим деган муқаддас нарсалар сақланарди.

Айрим ҳолларда руҳонийлар Худонинг иродасини билиш учун Урим ва Туммимдан фойдаланишарди (1 Шоҳлар 23:9-12 оятларга ва Чиқиш 28:15 нинг иккинчи изоҳига қаранг). Аммо эфод сўзи одамлар сажда қилишда ёки фол очишда ишлатган буюнни билдириши ҳам мумкин (Ҳакамлар 8:27 га ва ўша оятнинг изоҳига қаранг). Чамаси, бу ўринда Хўшёя эфод сўзининг иккинчи маъносини ишлатган.

**3:5 Довуд наслидан бўлган шоҳ** — бир кун келиб, шоҳ Довуднинг зурриёти Худонинг жамики ҳалқи устидан ҳукмронлик қиласи (Еремиё 30:9, Ҳизқиёл 34:24 га қаранг). Довуднинг ўғли Сулаймоннинг ўлимидан сўнг Истроилнинг ўнта қабиласи Довуд сулоласини рад этиб, ўз шоҳлигини барпо қилган эди. Тўлиқроқ маълумотга эга бўлиш учун луғатдаги ИСРОИЛ ва ЯҲУДО сўзларига қаранг.

**4:4 Менинг даъвоим сизларга қаршидир, Эй руҳонийлар!** — ёки *Сизнинг ҳалқингиз руҳонийларни айловчиларга ўхшайди*.

**4:8 гуноҳ қурбонликлари** — бирортаси билмай қилган гуноҳи учун Худодан кечирим сўраб келтирган қурбонлиги. Тўлиқроқ маълумотга эга бўлиш учун луғатдаги ҚУРБОНЛИК сўзи остида берилган ГУНОҲ ҚУРБОНЛИГИ иборасига қаранг.

**4:12 Таёқдан панд–насиҳат олишади** — баъзан таёқлар фол очиш учун ишлатилган (мисол учун, Ҳизқиёл 21:21 га қаранг).

**4:14 Саждагоҳ фоҳишалари** — ўша пайтларда Канъондаги бутпараст ҳалқлар ўз саждагоҳларида диний вазифалардан бирини фаҳш орқали бажаардилар. Бутпараст ҳалқларнинг удумларига кўра, одамлар фоҳишалар ва фоҳишлар билан жинсий алоқа қилиш орқали ўз худоларига топинардилар, худоларидан фаровонлик ато қилишни сўрардилар. Лекин Эгамиз Истроил ҳалқига бу йўл билан сажда қилишни қатъиян ман этган (Қонунлар 23:17-18 га қаранг).

**4:15 Гилгал** — Истроил ҳалқи Гилгалда бутларга топиниш учун саждагоҳ қурган эди (9:15, 12:11 га қаранг).

**4:15 Байт–Обун** — ибронийчадаги маъноси қабиҳлик уйи. Бу ўринда Хўшёя киноя билан Байтилга ишора қилган. Байтил сўзининг маъноси Худонинг уйи демакдир (Ибитидо 28:10-19 га қаранг). Аммо Истроил ҳалқи Байтилни бутпарастлик ўчогига айлантиргани учун, муаллиф бу шаҳарни қабиҳлик уйи деб атамоқда (З Шоҳлар 12:28-33, 4 Шоҳлар 10:29, Амос 7:13 га қаранг). Яна 10:5-8 га қаранг.

**4:16 ...уларни кенг далага ҳайдаб юбораман, Улар яйловдаги ёлғиз қўзига ўхшаб қолишади** — Истроил, яъни шимолий шоҳлик аҳолисининг Оссурияга асирликка олиб кетилишига ишора бўлса керак (1:4-5 нинг изоҳига қаранг). Яна 9:3, 11:5 га қаранг.

**4:17 Эфрайим** — Эфрайим қабиласи Истроилнинг шимолий қисмидаги энг катта ва нуфузли қабила бўлгани боис, Эски Аҳднинг баъзи ўринларида Эфрайим деган ном Истроилга, яъни шимолий шоҳликка нисбатан ишлатилган. Бу шоҳликнинг пойтахти Самария эди. Тўлиқроқ маълумотга эга бўлиш учун луғатдаги ЭФРАЙИМ сўзига қаранг.

**5:1 ...Миспах...Товур тоғи...** — бу ўринда Миспах сўзи Иордан дарёсининг шарқ томонида бўлган тоғли Гилад ўлкасидаги шаҳарга ишора қиласи (Ҳакамлар 11:29 га қаранг). Товур тоғи Иордан дарёсининг ғарб томонида бўлиб, Жалила кўлидан қарийб 20 километр жануби–ғарбда жойлашган. Иккала жой ҳам Истроил, яъни шимолий шоҳлик ҳудудидаги ўрмонли ерлар бўлиб, бу ерларда овчилар

тўрлар билан қушларни овлаган бўлишлари мумкин. Халқни бутларга сажда қилишга етаклаган йўлбошчилар қуш овлаган овчиларга ўхшатилган.

**5:3 Эфрайим — 4:17 изоҳига қаранг.**

**5:4 ...қалбинг шаҳватга тўлган —** Эски Аҳдда зино ёки фаҳш сўзлари кўпинча мажозий маънода ишлатилган бўлиб, Эгамизга хиёнат қилишни ва бошқа худоларга сифинишни билдиради. Ўша пайтларда Канъондаги бутпараст халқлар ўз саждагоҳларида диний вазифалардан бирини фаҳш орқали бажаардилар. Бутпараст халқларнинг удумларига кўра, одамлар фоҳишалар ва фоҳишлар билан жинсий алоқа қилиш орқали ўз худоларига топинардилар, худоларидан фаровонлик ато қилишни сўрардилар.

**5:5 У —** ибронийча матнда *Исройл ва Эфрайим*, 4:17 изоҳига қаранг.

**5:7 У Эгамизга хиёнат қилди... — 1:2, 2:2-5 га қаранг.**

**5:8 Бурғу чалинг Гивода...Рамада!** — душман ҳужум қилаётганда, халқни огоҳлантириш учун бурғу чалинарди. Гиво ва Рама шаҳарлари Бенямин қабиласи ҳудудида жойлашган эди.

**5:8 Байт-Обун — 4:15 нинг иккинчи изоҳига қаранг.**

**5:10 ...чегарани бузган...** — қадимги Исройлда бирортаси ўз ерини ажратиб олиш учун тошлардан чегара қилиб қўярди. Агар кимдир бу тошларни жойидан силжитса, қўшнисининг ота-бобосидан қолган ерни у ўғирлаётган ҳисобланарди ва бу оғир жиноят эди (Қонунлар 19:14, 27:17 га қаранг). Бу ўринда мазкур ибора мажозий маънода ишлатилган бўлиб, Яхудонинг йўлбошчилари ҳам Исройлнинг йўлбошчиларига ўхшаб ўз халқини бутларга сажда қилишга етаклаганига ишора қиласи. Йўлбошчиларнинг бу қилмиши оқибатида, Яхудо халқи ҳам Исройл сингари Худодан юз ўғирди. Шу бобнинг 4-5-оятларига ва 4:15, 6:4 га қаранг.

**5:13 Оссурия —** қадимги қудратли шоҳлик. Унинг пойтахти Найнаво шахри ҳозирги Ироқнинг шимолида жойлашган эди. Тўлиқроқ маълумотга эга бўлиш учун луғатдаги ОССУРИЯ сўзига қаранг.

**5:13 Буюк шоҳ —** Оссурия шоҳи Тиғлатпиласар назарда тутилган бўлиши мумкин (4 Шоҳлар 15:19 га қаранг). Тиғлатпиласар милоддан олдинги 745-727 йилларда хукмронлик қилган.

**6:4 Эфрайим — 4:17 изоҳига қаранг.**

**6:7 ...Одам Атодай... — ёки ...Адам шаҳрида...,** аммо бу шаҳар Муқаддас Китобда фақатгина бир марта айтиб ўтилган (Ёшуа 3:16 га қаранг). Одам Ато Адан боғида Худога итоатсизлик қилган эди (Ибитдо 2:15-17, 3:1-7 га қаранг).

**6:9 Шакам шаҳри —** Исройлда, яъни шимолий шоҳликда, Эбал ва Гаризим тоғлари орасида жойлашган эди. Ёшуа яшаган даврда Шакам шаҳри Исройл халқининг ўн икки қабиласи учун муҳим диний ва сиёсий марказ бўлган эди. Исройл халқи Канъон юртини босиб олгандан кейин Шакамда йиғилиб, Эгамизга содик бўлишга ва Унинг Мусо орқали берган қонунларига амал қилишга ваъда берган эди (Қонунлар 27:1-10, Ёшуа 8:30-35, 24:1, 24-25 га қаранг). Хўшёя яшаган даврда ҳам Шакам шаҳри Эгамизга содик қолган одамлар учун муҳим диний марказ бўлгани эҳтимолдан ҳоли эмас.

**7:1 У —** ибронийча матнда Эфрайим, 4:17 изоҳига қаранг.

**7:7 ...шоҳлари бирин-кетин нобуд бўляпти — 4 Шоҳлар 15:8-10, 13-14, 23-25, 30 га қаранг.**

**7:14** *Бутпарастлардай баданларини тилиб, Буғдои ва шароб талаб қилишади — баъзи иброний қўллёзмаларидан ва қадимиюнонча таржимадан. Ибронийча матнда Улар дон ва шароб учун йигиладилар. Баъзан одамлар Баалдан барака сўраш ва унга содиқлигини кўрсатиш учун баданларини тилардилар (З Шоҳлар 18:28 га қаранг).*

**8:1** *Душман — Оссурия лашкари назарда тутилган.*

**8:5** *Самарияликларнинг олтин бузоги — Истроил, яъни шимолий шоҳлик аҳолиси шоҳ Ерибом давридан бери бузоқ шаклидаги бутларга топинар эди. Бу бутни Ерибомнинг ўзи ясаттирган эди (З Шоҳлар 12:26-33 га қаранг). Самария Истроилнинг пойтахти эди.*

**8:9** *Эфрайим — 4:17 изоҳига қаранг.*

**8:10** *Оссурия шоҳи — ибронийча матнда Буюк шоҳ. Милоддан олдинги 722 йилда Оссурия шоҳи Шалманасар Истроилга, яъни шимолий шоҳликка ҳужум қилиб, пойтахти Самарияни забт этди. Сўнг Истроил халқининг аксарият қисмини Оссурияга сургун қилди (4 Шоҳлар 17:1-6 га қаранг). Шундай қилиб, шимолий шоҳлик таг-томири билан йўқ бўлиб кетди.*

**8:13** *Улар Мисрга қайтиб кетади — бу ўринда Мисрга қайтиш мажозий маънода ишлатилган бўлиб, Истроил халқининг Оссурияга сургун қилиниши назарда тутилган. Худо ўз халқини Мисрдаги қулликдан қутқарган эди (2:15 га қаранг), энди эса Истроил халқи Оссурияликларнинг қўлига тушиб, яна зулм остида қолади. Яна 9:3, 11:5 га қаранг.*

**9:1** ...*фоҳишадай...* — Эски Аҳдда зино ёки фаҳш сўзлари кўпинча мажозий маънода ишлатилган бўлиб, Эгамизга хиёнат қилишни ва бошқа худоларга сиғинишини билдиради. Баалга хизмат қилиш эвазига мўл ҳосил олишга ишонган одамлар кўрсатган хизмати учун ҳақ оладиган фоҳишага қиёс қилинганлар.

**9:3** ...*Мисрга қайтиб кетасан — 8:13 изоҳига қаранг.*

**9:4** ...*азадорнинг нонига ўхшайди...* — мурдага теккан одам ушлаган нон ҳам, ўлик чиққан уйдаги нон ҳам ҳаром ҳисобланарди (Саҳрова 19:11-16, Қонунлар 26:14 га қаранг).

**9:6** *Миср — 8:13 изоҳига қаранг.*

**9:6** *Нуф — Мемфис номи билан ҳам маълум. Мемфис шаҳри Миср шимолий ҳудудининг маркази бўлиб, Миср тарихида бирмунча вақт пойтахт ҳам бўлган эди.*

**9:8** *Эфрайим — 4:17 изоҳига қаранг.*

**9:9** *Гивода разиллик қилган аждодларинг — бу ибора Ҳакамлар 19:11-20:48 да баён қилинган воқеага, яъни бир аёлнинг зўрланиши ва ўлдирилиши ҳамда шундан кейин бўлиб ўтган аянчли воқеаларга ишора қилади.*

**9:10** ...*улар Пиёр тоғига келганда...* — Саҳрова 25:1-9 га қаранг.

**9:15** *Гилгал — Истроил халқи Гилгалда бутларга топиниш учун саждагоҳ қурган эдилар (4:15, 12:11 га қаранг).*

**10:5** *Самария аҳли — 8:5 га ва ўша оятнинг изоҳига қаранг.*

**10:5** *Байт-Обун — ибронийчадаги маъноси қабиҳлик уйи. Бу ўринда Хўшёя киноя билан Байтилга ишора қилган. Байтил сўзининг маъноси Худонинг уйи демақдир (Ибитдо 28:10-19 га қаранг). Аммо Истроил халқи Байтилни бутпарастлик ўчогига айлантиргани учун, муаллиф бу шаҳарни қабиҳлик уйи деб атамоқда (З Шоҳлар*

12:28-33, 4 Шоҳлар 10:29, Амос 7:13 га қаранг).

**10:5** Олтин бузоги — 8:5 изоҳига қаранг.

**10:6** Буюк шоҳ — 8:10 изоҳига қаранг.

**10:6** Эфрайим — 4:17 изоҳига қаранг.

**10:6** ...Умидини бутга боғлагани учун... — ёки ...Ўзлари қулоқ солган маслаҳат туфайли....

**10:8** Обун — ибронийчадаги маъноси қабиҳлик бўлиб, Байт-Обун назарда тутилган. Шу бобнинг 5-оятига ва ўша оятнинг иккинчи изоҳига қаранг

**10:9** ...сен Гивода гуноҳ қила бошладинг... — 9:9 га ва ўша оятнинг изоҳига қаранг.

**10:11** ...Янчишини у хўп яхши қўрарди — донни бошоқдан ажратиш жараёни янчиш дейилади. Қадимги Яқин Шарқда бу иш дон бошоқларини таёқ билан уриш, устидан тепкилаш ёки хўптири юргизиш орқали бажарилган (хўптири — остига учли тош ёки темир маҳкамланган оғир тахта). Хўптири тортаётган ҳайвонлар янчилётган дондан ейишлари учун тўсқинлик қилинмаган (Қонунлар 25:4 га қаранг). Хўшёя бу образ орқали Истроил, яъни шимолий шоҳлик аҳолисининг лоқайдлигини, улар Худонинг баракаларидан семириб кетганини, ўзларининг ҳаёти Худога боғлиқ эканини унтиб, Унга сажда қилмай қўйганини тасвирлайди (13:6 га қаранг). Яна Қонунлар 32:15-18 га қаранг.

**10:11** Энди унга омоч тортираман — омоч тортиш ғалла янчишдан кўра анча оғир иш эди. Бу ўринда мазкур образ Истроил халқи Худонинг баракаларидан маҳрум бўлишини ва Оссурияга сургун қилинишини ифодалайди.

**10:11** ...Яхудо шудгор қилсан — Яхудо, яъни жанубий шоҳлик ҳам Худо томонидан ҳукм қилинишига ишора. Милоддан олдинги 586 йилда Бобил шоҳи Навуходназар Қуддусни вайрон қилиб, аҳолининг асосий қисмини Бобилга сургун қилган эди (4 Шоҳлар 25:1-21 га қаранг). Хўшёя асосан Истроилга, яъни шимолий шоҳликка қарши башорат қилган, айни пайтда Яхудо, яъни жанубий шоҳлик аҳолисига ҳам қарши башорат қилган (4:15, 5:5, 10, 14, 6:11, 8:14 га қаранг).

**10:11** Эфрайим — ибронийча матнда Ёқуб. Эфрайимга, яъни шимолий шоҳликка ишора қилишнинг яна бир йўли (4:17 изоҳига қаранг).

**10:14** Шоҳ Шалман Байт-Арбэлни жангда вайрон қилгандаи... — бу воқеа ҳақида бошқа ҳеч қандай маълумот йўқ. Шалман Шалманасар исмининг қисқа шакли бўлиб, Оссурия шоҳларининг бир нечтаси Шалманасар исми билан танилган.

**10:15** Байтил — ибронийчадаги маъноси Худонинг уйи. Истроил халқи Байтилни бутпарастлик ўчоғига айлантиргани учун, муаллиф кесатиб, Истроил халқини Байтил деб атаган (шу бобнинг 5-оятига берилган иккинчи изоҳга қаранг).

**11:1** ...Ўз ўғлонимни Мисрдан чақириб олган эдим — Чиқиш 4:22-23 га қаранг.

**11:2** ...чақирысан, Мендан... — ибронийча матндан сўзма-сўз таржимаси ...чақирысалар, улардан.... Ибронийча матнда ишлатилган учинчи шахс шакли Худонинг пайғамбарларини билдиради (мисол учун, 4 Шоҳлар 17:13-14, Еремиё 7:25-28 га қаранг). Мазкур таржима равон ўқилиши учун биринчи шахс тилидан баён қилинган.

**11:3** Эфрайим — 4:17 изоҳига қаранг.

**11:4** бўйинтуруқ — Истроил халқининг Мисрдаги қуллигига ишора. Бу ўринда бўйинтуруқни олиб ташлаш Худо Ўз халқини зулмдан халос қилишини билдиради. 10:11 да бўйинтуруқ тақиши Худо Ўз халқини жазолашини, душманлар

уларга зулм ўтказишини англатади.

**11:5 ...Мисрға жўннатиб жазолайман... — 8:13 изоҳига қаранг.**

**11:7 Пайғамбарларим халқни Менга қайтишга даъват қилса-да...мадад тиламайди — ёки Улар бошқа худога илтижо қиласидилар, аммо ўша худо уларга ёрдам бермайди.**

**11:8 Адма...Завўйим... — Садўм ва Ғамўра шаҳарлари билан бирга яксон қилинган шаҳарлар (Ибтидо 19:24-25, Қонунлар 29:23 га қаранг).**

**11:10-11 ...ғарбдан...<sup>11</sup>...Мисрдан...Оссурия юртидан — Ишаё 11:10-12 га қаранг.**

**11:12 Яхудо халқи Менга қарши бош кўтарди...улар итоат қилмаяпти — ёки Яхудо халқи Менга эргашмоқда...улар содик қолмоқда. Бу оятда ишлатилган ибронийча феъл Яхудо ҳақидаги яхши ёки ёмон хабарни билдириши мумкин. Бу ўринда ёмон хабар эканлигининг эҳтимоли кўпроқ. Хўшёя асосан Истроилга, яъни шимолий шоҳликка қарши башорат қилган, баъзи ўринларда эса Яхудо, яъни жанубий шоҳлик аҳолисига ҳам қарши башорат қилган (4:15, 5:5, 10, 14, 6:11, 8:14, 10:11, 12:2 га қаранг).**

**12:1 Эфрайим — 4:17 изоҳига қаранг.**

**12:1 гармсөл — иссиқ шамол.**

**12:2 Ёқуб насли — Худо Ёқубнинг исмини Истроил деб ўзгартирган (Ибтидо 32:27-28 га қаранг), шунинг учун кўпинча Ёқуб насли деганда Истроил, яъни шимолий шоҳлик аҳолиси назарда тутилади. Бироқ бу ўринда мазкур исм ҳам Истроил, ҳам Яхудо халқларига нисбатан ишлатилган. Ёқуб бу иккала халқнинг бобокалони бўлган.**

**12:3 ...Ёқуб акаси билан талашган... — ёки ...Ёқуб ўз акасининг товонини ушлаб олган.... Ибтидо 25:26 га ва ўша оятнинг изоҳига қаранг. Яна Ибтидо 25:29-34, 27:1-45 га қаранг.**

**12:3 ...Худо билан олишган — Ибтидо 32:22-30 га қаранг.**

**12:4 фаришта — Эгамизнинг фариштаси назарда тутилган, баъзан бу ибора Худонинг Ўзи зоҳир бўлганига ишора қилинади. Тўлиқроқ маълумотга эга бўлиш учун луғатдаги ЭГАМИЗНИНГ ФАРИШТАСИ иборасига қаранг.**

**12:4 Байтилда... — Ибтидо 28:10-22, 35:1-15 га қаранг.**

**12:4 ...Худо билан суҳбат қурганди — қадимий юононча ва сурёнийча таржималардан. Ибронийча матнда ...биз Худо билан суҳбат қургандик. Ёқуб Истроил халқининг бобокалони эди. Шунинг учун унинг Худо билан суҳбат қургани Истроил халқига худди уларнинг ўзи Худо билан суҳбат қургандай бўлиб туюлса керак.**

**12:9 Ўша даврдагидай сени яна чодирларда яшаттираман — Эгамиз Ўз халқини Мисрдаги қулликдан қутқаргандан кейин, улар қирқ йил саҳрова кўчманчилардай яшаган эдилар. Ўша даврда уларнинг ҳар қандай муҳтожлигини фақатгина Худо қондиради. Истроил халқи Канъон юртига киришидан олдин Мусо уларни, такаббурлашиб кетманглар, Худони унутманглар, деб огоҳлантирган эди (13:5-6 га ва Қонунлар 8:1-19 га қаранг). Хуллас, Худонинг халқи яна фақатгина Худога таяниб яшашни ўрганиши керак эди.**

**12:11 Гилад — 6:8 га қаранг.**

**12:11 Гилгал — Истроил халқи Гилгалда бутларга топиниш учун саждагоҳ қурган эди (4:15, 9:15 га қаранг). Гилад ва Гилгал номлари ўзаро оҳангдош. Бу икки ном**

бутун Исроилни, яъни шимолий шоҳликни билдиради. Гилад шоҳликнинг Иордан дарёсидан шарқий қисмини, Гилгал ғарбий қисмини билдирган.

**12:12 Орам — Паддон-Орамнинг қисқа шакли.** Паддон-Орам Фурот дарёси бўйида, ҳозирги Сурия мамлакатининг шимолида ва ҳозирги Туркияning жануби-шарқида жойлашган ҳудуд эди. Ёқубнинг бобоси бўлган Иброҳимнинг баъзи қариндошлари шу ҳудудда яшаган.

**12:12 Ёқуб Орам юртига қочиб борди...** — Ибтидо 28:1-5 га қаранг.

**12:12 у — ибронийча матнда Исроил, Ёқубнинг яна бир исми.**

**12:12 ...Қалин эвазига қўйлар боқди** — Ибтидо 29:1-20 га қаранг.

**12:13 пайғамбар** — Мусо назарда тутилган.

**12:13 Ёқуб насли** — ибронийча матнда Исроил, Ёқуб наслининг яна бир номи.

**13:1 Эфрайим** — 4:17 изоҳига қаранг.

**13:2 ...Кумушдан...санамлар ишилашар...** — эҳтимол, кумушдан ясалган бу санамлар хонаки санамлар бўлиб, Байтилдаги олтин бузоқ шаклида бўлган (8:5 га ва ўша оятнинг изоҳига қаранг).

**13:2 Менинг халқимга шундай деб айтишияпти...** — З Шоҳлар 12:26-33 га қаранг.

**13:2 Олтин бузоқларни ўпинглар!** — мазкур бутларга итоаткорлик ва садоқат белгиси. З Шоҳлар 19:18 га қаранг.

**13:5 ...саҳрода...** — Худо Ўз халқини Мисрдаги қулликдан қутқаргандан кейин, улар қирқ йил саҳрода кўчманчилардай яшаганлар.

**13:6 Серҳосил ўлкада қорнингни тўйғиздим...** — Қонунлар 8:7-11 га қаранг.

**13:14 Мен бу халқни...қутқарармиканман?! Уларни...халос қиласмиканман?!** — бу иборани дарак гап шаклида **Мен бу халқни...қутқараман. Уларни...халос қиласман** деб таржима қиласа ҳам бўлади. Аммо дарак гап бу ўринда тўғри келмайди, чунки қолган оятларда муаллиф Исроил халқини Худонинг ҳукми ҳақида огоҳлантиряпти.

**13:14 ўликлар диёри** — ибронийча матнда Шеўл. Қадимда Исроил халқи Шеўлни ер остидаги тубсиз чуқурлик, мархумлар борадиган қоронғи жой деб тушунарди.

**13:14 Эй ўлим, қирғин олиб келгин!** Эй ўликлар диёри, ҳалокатли қучингни кўрсатгин! — ибронийча матнда Эй ўлим, сен келтирадиган қирғин қани?! Эй ўликлар диёри, ҳалокатли қучинг қани?! Бу ўриндаги саволлар мажозий маънода ишлатилган бўлиб, Худо албатта Исроил халқини жазолашига ишора қиласи.

**13:15 гармсел** — ҳосилга катта зиён келтирадиган иссиқ шамол. Бу ўринда мажозий маънода ишлатилиб, Худонинг ҳукмини билдиради.

**14:1 Самария аҳолиси** — 8:5 га ва ўша оятнинг изоҳига қаранг.

**14:9 Эфрайим** — 4:17 изоҳига қаранг.

**14:9 ...Мен бутларингга асло ўхшамайман!** — ёки ...Энди бутларингни ташла!

**14:9 Мен доим яшил сарв дараҳти кабидирман...** — Эски Аҳдда Худо фақат шу жойда дараҳтга қиёсланган. Канъондаги халқларнинг удумига кўра, саждагоҳлар сербарг дараҳтлар остида ёки тепаликларда жойлашган эди. Ўша жойларда одамлар Баал ва шунга ўхшаш маҳаллий худоларга қурбонлик келтириб, улардан ёмғир ёғдиришни, ўзларининг молларию далаларига барака беришни сўрардилар. Бу ўринда Худо Ўз халқига фақатгина Унинг Ўзи доим барака ва

унумдорлик манбай эканлигини эслатади.